

03 NOV 2000

SASTERAWAN MULA TIBA UNTUK BERKAMPUNG DI LANGKAWI

LANGKAWI, 3 Nov (Bernama) -- Sasterawan Afrika Selatan dan Britain adalah antara peserta luar negara yang tiba di sini hari ini untuk menyertai Hari Puisi Nasional ke-XV di pusat peranginan Kampung Tok Senik di sini esok.

Pengarah Hari Puisi Abdul Rahman Ahmad hari ini berkata penyertaan mereka akan memeriahkan lagi hari puisi yang dijadual dirasmikan oleh Perdana Menteri Datuk Seri Dr Mahathir Mohamad malam esok.

Katanya wakil-wakil negara Asean seperti Indonesia, Brunei dan Thailand selain dari Malaysia adalah antara kira-kira 200 penyair yang tiba di sini hari ini untuk menyertai perhimpunan rasmi para penyair nasional yang dimulakan sejak 1971 di Pantai Kundur, Tanjung Keling, Melaka dan yang terakhir di Seremban pada tahun lepas.

Pembacaan puisi khas dan persembahan lagu-lagu puisi oleh penyair terkenal adalah di antara aturcara yang akan diadakan di Dataran Lang malam ini, katanya ditemui di sini.

Karyawan seni itu akan diraikan pada majlis kenduri tradisional di Kampung Bayas Ulu Melaka di sini Ahad ini yang akan turut diserikan dengan majlis berzanji, marhaban dan persembahan silat, kata Abdul Rahman yang juga Setiausaha Majlis Kebudayaan Kedah.

Katanya suasana kenduri di kampung yang sering diamalkan akan ditonjolkan bagi membolehkan penyair terutama dari luar negeri melihat secara dekat cara kehidupan masyarakat kampung.

Hari Puisi itu dianjurkan oleh kerajaan negeri dan dikelolakan oleh Majlis Kebudayaan Kedah, Angkatan Sasterawan Nasional Kedah, Gabungan Persatuan Penulis Nasional (Gapena) dengan kerjasama Kementerian Kebudayaan, Kesenian dan Pelancongan, Dewan Bahasa dan Pustaka (DBP) serta Lembaga Pembangunan Langkawi (Lada).

-- BERNAMA

ZI NH RI